

3 September, 1981

Berbagai acara sambut Hari Angkatan Tentera

KUALA LUMPUR, Rabu — Kira-kira 5,000 orang pegawai dan anggota tentera akan menyertai perbarisan menyambut Hari Angkatan Tentera Ke-48 di Tugu Negara mulai jam 7.30 pagi 16 September ini.

Perdana Menteri Datuk Seri Dr. Mahathir Mohamad selaku Menteri Pertahanan dijangka memeriksa perbarisan tersebut. Beliau kemudian akan merasmikan Maktab Pertahanan Angkatan Tentera di Jalan Padang Tembak di sini jam 10 pagi.

Jurucakap Bahagian Perhubungan Raya Kementerian Pertahanan memberitahu hari ini, berbagai perayaan diatur bagi menyambut Hari Angkatan Tentera.

Seri Paduka Baginda Yang di-Pertuan Agong berkenan mengurniakan bintang dan pingat kepada 150 orang anggota tentera berbagai unit dan pasukan di Istana Negara pada 17 September.

Seri Paduka Baginda sebelum itu akan berangkat menghadiri majlis makan malam di Hotel Hilton yang akan diadakan mulai jam 7.30 malam 16 September.

Perayaan tersebut bermula dari 12 September dengan pameran Badan Keluarga Angkatan Tentera (BAKAT) di Dewan Tuanku Abdul Rahman yang akan dirasmikan oleh Raja Permaisuri Agong.

Satu pameran Angkatan Tentera dijangka diadakan di Muzium Negara selama lapan hari mulai 14 hingga 21 September. Seri Paduka Yang di-Pertuan Agong dijangka merasmikan pameran tersebut.

Untuk mengenang pemimpin dan perwira yang telah gugur, majlis tahlil dan sembahyang dan upacara lain-lain agama akan juga diadakan pada 17 September.

Bahan asal dari Arkib
Negara Malaysia